

VENDIM
Nr. 541, datë 29.7.2022

**PËR KRITERET E PËRZGJEDHJES TË ANËTARËVE, SI DHE PËR
ORGANIZIMIN, FUNKSIONIMIN DHE KOMPETENCAT E KËSHILLIT
KONSULTATIV PËR NDËRMARRJET MIKRO, TË VOGLA DHE TË MESME**

Në mbështetje të nenit 100 të Kushtetutës dhe të pikës 5, të nenit 17, të ligjit nr. 43, datë 21.4.2022, “Për zhvillimin e ndërmarrjeve mikro, të vogla dhe të mesme”, me propozimin e ministrit të Financave dhe Ekonomisë, Këshilli i Ministrave

VENDOSI:

I. DISPOZITA TË PËRGJITHSHME

1. Ky vendim ka si qëllim përcaktimin e kriterëve të përzgjedhjes të anëtarëve, si dhe rregullave të hollësishme për organizimin, funksionimin dhe kompetencat e Këshillit Konsultativ për ndërmarrjet mikro, të vogla dhe të mesme.

2. Termat e përdorur në përmbajtje të këtij projektvendimi kanë të njëjtin kuptim me përkufizimet e dhëna në nenin 3, të ligjit nr. 43/2022.

II. KRITERET E PËRZGJEDHJES TË ANËTARËVE TË KËSHILLIT KONSULTATIV

1. Përzgjedhja e anëtarëve të Këshillit Konsultativ bëhet nga institucionet e përcaktuara në pikën 4, të kreut III, të këtij vendimi, pas plotësimit në mënyrë kumulative të kriterëve të përzgjedhjes të përcaktuara në këtë krye.

2. Kriteret e përzgjedhjes, që duhet të plotësojnë anëtarët e Këshillit Konsultativ janë, si më poshtë vijon:

- a) të kenë integritet të lartë moral dhe profesional;
- b) të pranojnë në mënyrë vullnetare të jenë anëtarë të Këshillit Konsultativ;
- c) të kenë aftësi të mira komunikimi dhe mund të kontribuojnë në propozimin për përmirësimin e klimës së biznesit;
- ç) Të jenë të pavarur dhe të paanshëm në ushtrimin e funksioneve të tyre si anëtarë të Këshillit Konsultativ.

III. RREGULLA TË HOLLËSISHME PËR ORGANIZIMIN, FUNKSIONIMIN DHE KOMPETENCAT E KËSHILLIT KONSULTATIV PËR NDËRMARRJET

1. Këshilli Konsultativ për ndërmarrjet mikro, të vogla dhe të mesme, (në vijim “Këshilli”) ngrihet në përputhje me parashikimin e pikës 5, të nenit 17, të ligjit nr. 43/2022, dhe ka si qëllim dhënien e mendimeve, këshillave dhe diskutimin e çështjeve që lidhen me ofrimin e mbështetjes dhe zhvillimin e biznesit, si dhe mënyrën e hartimit të skemave mbështetëse për biznesin.

2. Këshilli është organ kolegjal, i cili ushtron veprimtarinë e tij këshillimore, në përputhje me legjislacionin në fuqi për organet kolegiale.

3. Këshilli kryesohet nga ministri përgjegjës për çështjet e ekonomisë dhe ka në përbërje të tij 11 anëtarë, si më poshtë vijon:

- a) 1 (një) përfaqësues nga ministria përgjegjëse për financat dhe ekonominë, përgjegjës për politikën e nxitjes së biznesit;
- b) 1 (një) përfaqësues nga ministri i shtetit, përgjegjës për mbrojtjen e sipërmarrjes, përgjegjës për *start-up*-et dhe inovacionin;
- c) 1 (një) përfaqësues nga Agjencia Shqiptare e Zhvillimit të Investimeve, përgjegjës për mbështetjen e biznesit;
- ç) 1 (një) përfaqësues nga Bashkimi i Dhomave të Tregtisë dhe Industrisë, përgjegjës për bashkëpunimin me biznesin;
- d) 3 (tre) përfaqësues të sipërmarrjes dhe biznesit, të përzgjedhur nga organizatat dhe dhomat më të përfaqësuara të tregtisë dhe biznesit;

dh) 1 (një) përfaqësues nga Shoqata e Bankave, përgjegjës për mirëfunksionimin e sistemit bankar;

e) 2 (dy) përfaqësues nga institucionet e arsimit të lartë, nga të cilët një përfaqësues nga institucionet publike të arsimit të lartë dhe një përfaqësues nga institucionet jopublike të arsimit të lartë;

ë) 1 (një) përfaqësues nga njësitet e vetëqeverisjes vendore, të propozuar nga Shoqata e Bashkive të Shqipërisë, përgjegjës për qeverisjen vendore.

4. Përzgjedhja e anëtarëve të Këshillit bëhet, si më poshtë vijon :

a) Anëtarët e Këshillit, pjesë e organeve të administratës publike, caktohen nga ministrat përgjegjës, përkatësisht, për ekonominë, sipërmarrjes dhe arsimit;

b) Anëtari i Këshillit, sipas përcaktimit të dhënë në shkronjën “c”, të pikës 3, të kreut III, të këtij vendimi, caktohet nga ministri përgjegjës për çështjet e ekonomisë, me propozim të drejtorit ekzekutiv të AIDA-s;

c) Anëtari i Këshillit, sipas përcaktimit të dhënë në shkronjën “ç” të pikës 3, të kreut III, të këtij vendimi, caktohet nga ministri përgjegjës për çështjet e ekonomisë, pas propozimit nga Bashkimi i Dhomave të Tregtisë dhe Industrisë;

ç) Anëtari i Këshillit, sipas përcaktimit të dhënë në shkronjën “d”, të pikës 3, të kreut III, të këtij vendimi, caktohet nga ministri përgjegjës për ekonominë, me propozimin e përfaqësuesve më të mëdhenj të sipërmarrjes dhe biznesit;

d) Anëtari i Këshillit, sipas përcaktimit të dhënë në shkronjën “dh”, të pikës 3, të kreut III, të këtij vendimi, caktohet nga ministri përgjegjës ekonominë, me propozimin e Shoqatës së Bankave;

dh) Anëtari i Këshillit, sipas përcaktimit të dhënë në shkronjën “ë”, të pikës 3, të kreut III, të këtij vendimi, caktohet nga ministri përgjegjës për ekonominë, me propozimin e Shoqatës së Bashkive të Shqipërisë.

5. Anëtarët e Këshillit Konsultativ emërohen me mandat 3 (tre) vjet, me të drejtë riemërimi një herë.

6. Anëtari i Këshillit lirohet ose shkarkohet nga detyra përpara mbarimit të mandatit nga organi që e ka emëruar, kur vërtetohet se:

a) është dënuar nga gjykata, me vendim të formës së prerë, për kryerjen e një vepre penale;

b) ndodhet në pamundësi fizike ose mendore për të ushtruar funksionet e ngarkuara, për një periudhë mbi 6 (gjashtë) muaj;

c) shkel rëndë rregullat e etikës së punës në administratën publike, në përputhje me parashikimet e kodit të etikës;

ç) vepron në shkelje të detyrave të përcaktuara sipas ligjit;

d) jep dorëheqjen.

7. Këshilli merr vendime me shumicë të thjeshtë të votave të anëtarëve të pranishëm. Anëtarët e Këshillit, në përputhje me legjislacionin në fuqi për konfliktin e interesit, nuk marrin pjesë në proceset e diskutimit dhe këshillimit dhe vendimmarrëse, kur kanë dyshime për ekzistencën e konfliktit të interesit.

8. Në ushtrimin e detyrave, sipas përcaktimeve të këtij vendimi, Këshilli Konsultativ për ndërmarrjet mbështetet nga Sekretariati teknik. Detyrat e Sekretariatit teknik të Këshillit kryhen nga anëtarët e përzgjedhur nga ministria përgjegjëse për ekonominë dhe Agjencia Shqiptare e Zhvillimit të Investimeve (AIDA).

9. Këshilli Konsultativ ushtron kompetencat e përcaktuara në pikën 4, të nenit 17, të ligjit nr. 43/2022.

10. Sekretariati teknik i Këshillit ushtron detyrat, si më poshtë vijon:

a) Organizon mbledhjet e këshillit, përgatit dhe administron dokumentacionin që shqyrtohet në to;

b) Kryen komunikimet dhe njoftimin e palëve të treta, për llogari të Këshillit;

c) Mbledh të dhëna, informacione dhe statistika që lidhen apo ndihmojnë në ushtrimin e veprimtarisë nga Këshilli.

IV. DISPOZITA TË FUNDIT

1. Brenda 15 (pesëmbëdhjetë) ditëve nga hyrja në fuqi e këtij vendimi, institucionet e parashikuara në shkronjat “a”, “b”, “c”, të pikës 4, të kreut III, të këtij vendimi, përcjellin pranë ministrit përgjegjës për ekonominë emrat e anëtarëve të përzgjedhur.

2. Brenda 15 (pesëmbëdhjetë) ditëve nga hyrja në fuqi e këtij vendimi, Bashkimi i Dhomave të Tregtisë dhe Industrisë, shoqatat e biznesit dhe Shoqata e Bashkive të Shqipërisë përcjellin pranë ministrit përgjegjës për ekonominë emrat e anëtarëve të përzgjedhur, së bashku me argumentet dhe sqarimet përkatëse.

3. Brenda 10 (dhjetë) ditëve nga marrja e emrave përkatës, sipas pikave 1 dhe 2, të këtij kreu, ministri përgjegjës për ekonominë emëron anëtarët e Këshillit Konsultativ.

4. Ngarkohen Ministria e Financave dhe Ekonomisë dhe Agjencia Shqiptare e Zhvillimit të Investimeve (AIDA) për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama